



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Munisípiu Likisa
21 Dezembru 2016

**Komunidade Suku Vaviquinia ezijé Governu atu distribui Jornál Repúblika ba iha
autóridade suku sira hanesan parte ida hosi sosializasaun ba lei aplikavel sira**

Komunidade Suku Vaviquinia ezije ba Governu atu distribui informasaun kona-ba lei sira ne'ebé pública ona iha Jornál Repúblika ba iha nível suku. Ne'e atu fasilita povu sira asesu ba lei sira ne'ebé promulga ona iha Jornal Repúblika no vigora ona iha nasaun ne'e hodi obriga sidadaun hotu tenki kumpri. Ezijénsia ne'e hato'o liuhosi atividade treinamentu kona-ba "Demokrasia no Kna'ar Órgaun Soberanu sira nian no partisipasaun públiku iha prosesu halo lei no asesu ba justisa formál" iha Suku Vaviquinia, Postu Administrativu Maubara, Munisípiu Likisa. Treinamentu ne'e organiza hosi JSMP iha 15 Dezembru 2016.

Treinamentu ne'e hetan partisipasaun másimu husi comunidade no estrutura suku sira ho total partisipante ne'ebé partisipa iha treinamentu ne'e hamutuk na'in 23; kompostu husi Feto nain 11 no mane na'in 12.

"Ezijénsia ne'e pertinente tebes tanba comunidade barak iha iha teritóriu Timor laran ne'ebé la iha meius atu asesu rasik informasaun kona-ba lei aplikavel sira liuliu iha área remota ka isoladu sira ne'ebé hanesan Suku Vaviquinia rasik. Instituisaun estadu sira, partikularmente ministériu justisa tenke sosializa informasaun importante sira kona-ba lei sira ne'ebé tama ona vigór ba suku sira hotu atu nune'e sira bele asesu no iha koñesimentu ba lei sira ne'e ", dehan Diretor Ezekutivu JSMP, Luis de Oliveira Sampaio

Durante treinamentu comunidade sira hato'o sira nia preokupasaun kona-ba dinámika demokrasia iha Timor-Leste. Comunidade sira haktuir katak demokrasia hanesan meius ida atu ezijé partisipasaun ema hotu nian iha prosesu dezvoltamentu. Maibé dala-barak demokrasia no liberdade ne'e uja la-tuir nia dalan loloos tanba la-ia limete hodi prejudika mós ema seluk nia direitu atu goja. Aleinde ne'e, comunidade mós husu ba governante sira atu halo konsultasaun públiku ba lei sira ne'ebé sira esbosu antes hato'o ba iha Parlamentu atu diskuti no aprova atu aseguira katak lei sira ne'e refléta kondisaun moris povu nian.

JSMP konsidera ezijénsia comunidade nian importante no real teb-tebes atu Governu no Parlamentu Nasionál konsidera hodi involve partisipasaun povu iha prosesu halo lei.

Iha enseramentu ba treinamentu ne'e, Xefi Suku Vaviquinia, Sr. Alcino Nunes agradece no konsidera importante tebes treinamentu ne'ebe JSMP fornese ba iha comunidade suku Vaviquinia. Programa ne'e importante hodi fahe informasaun ba comunidade sira atu comunidade sira bele hatene no kompriende di'ak demokrasia no kna'ar órgaun estadu sira nia inklui lei aplikável sira iha prosesu kazu krimi no sivíl. Sr. Nunes husu JSMP atu kontinua fahe informasaun kona-ba lei nian ba iha sira nia suku atu comunidade sira bele kompriende di'ak liutan ita nia lei iha Timor Leste.

Programa ne'e hetan apoiu finanseiru hosi Governu Austrália



Atu hetan informasaun liutan favor kontaktu direktamente:

Luis de Oliveira Sampaio

Diretór Ezekutivu JSMP

E-mail: luis@jsmp.minihub.org